

## **Pɔɔl gbouŋ nba pukin ŋanlee ki u din sɔb ki tur KORINT TEEB nae na**

*Ki jiin 2 Korint teeb gbouŋ na po*

Pɔɔl din sɔb u gbouŋ nba pukin ŋanlee ni, ki li saa Korint teeb boor, yoo nba ki ŋɔɔ Pɔɔl nan Yiisaweira nba be leŋ na binbenj paar bonchiann nae.

<sup>1</sup> Min Pɔɔl nba ki Yennu loomm ni ki u teenin Yiisa Masia toonii na, min nan ti naa bik Timoti-e sɔbin gbouŋ na ki teen Yennu niib nba be Korint, nan u niib kur nba be Akaya tingbouŋ kur ni. <sup>2</sup> Ti Baa Yennu nan ti Yomdaano Yiisa Masia ninkpabaun nan parmaasir-ii be nani.

*Pɔɔl nba teen Yennu niipoouk bianjinba*

<sup>3</sup> Ŋaant ki ti tur Yennu nba tee ti Yomdaano Yiisa Masia Baa na niipoouk; ŋɔɔe tinit ninbaauk; u boor nie ki ti parmaann kur nyi. <sup>4</sup> Ŋɔɔe maant ti para ti biak kur ni, a tin mun fit maan binba be biak booru booru ni na para, nan Yennu nba maan ti para bianjinba na. <sup>5</sup> Ti biak dinu Masia sann paak nba yab bianjinba, nnae ki ti parmaann mun bia yab kimaan ŋɔɔ Masia paak. <sup>6</sup> Taa loon ki tin maan i para ki te ki yin la tinnu na paake te ki ti di biak. Ti-i la parmaann, li tee i paake, a tin mun maan i para, ki yin mun la sukuru ki di biak nan taa dir bianjinba na. <sup>7</sup> Li paak, ti mɔk dindann ki jiin i po nan i saa saan

toonna, kimaan ti mi nan yaa di biak nan taa mun di bianjinba na, nnae ki i mun bia sii laat parmaann nan taa laat bianjinba na.

<sup>8</sup> N naa waas, n loon ki n tiari biak nba ki ti din dii Asia yent ni na poe. Biak man din mantik gar ti paŋ terik ki tan te ki ti ŋaa dindann ti moŋ manfoa powa, <sup>9</sup> kimaan ti ji din tan dukii nan kuun ki fok nanti, ŋaan linba na din tun a lin wannit nan li ki ŋan ki tii maa ti moŋ paaki, ŋaan kii maa Yennu nba fiint kpeemm na paak. <sup>10</sup> Ŋooe din nyinnit kuun dangberjir na ni. U saa tinnita, ki ti mok dindann nan u bia saa tinnit yoo nan yoo. <sup>11</sup> Yi mun bia sommit nan Yenmiaru man, ki u saa gat niib bonchiann miaru nba ki bi mei ki teent na, ki saa sommit, ki niib bonchiann saa turo niipoouk ti paak.

### *Ki jün Pɔɔl lora lebitu po*

<sup>12</sup> Linba te ki ti mok yuugontir na tee nnae: ti dudukite wantit nan ti mok barmɔnpaku nan yentinu, tingbouŋ na niib boor, mantik taa daa be nani ki timm nan yimm tee weinanleeb na; Yennu sommir paake te ki ti be nna man, li ki tee nisaarii yan paak kaa. <sup>13</sup> Ti sobin linba ki i saa fit karin bann li paake ki teeni na, ŋaan mok dindann nan i tan saa bann fanu <sup>14</sup> nan yaa poŋ bann waamina bianjinba na, a i tan saa fit kii mok yuugontir ti paak, nan taa mun sii mok yuugontir i paak, ti Yomdaano Yiisa jenu daar bianjinba na.

<sup>15</sup> Maa bann linba na paake ki n daan lor maa n poŋ jen i boor, ki yin la sommir taar munlee, <sup>16</sup> kimaan n daan lor nan mi-i tani gaar

saa Masedonia man bot gɔnie, ki mi-i tanj jent man bia bot gɔni, ki la sommir i boor, linba saa sommin ki n nmat saan Judea. <sup>17</sup> Ki n lor maŋ daan tee kpinkpannii lore-e? koo maa daan lor maa n tun linba maŋ tee nan tingbouŋ na yab nba tuu yet a, “Nn, nn,” njaan bia tan yet a “Aaii, aaii” nae-e? <sup>18</sup> Njaan Yennu nba tee barmonii daano na paak, n mɔsonn nba ki n daan turi na ki tee “Nn” nan “Aaii” kaa. <sup>19</sup> Kimaan Yiisa Masia nba tee Yennu Bija, wunba ki min nan Sailas nan Timoti din mɔont u po ki turi na, u ki tee “Nn” nan “Aaii” kaa, njaan u tee “Mme.” <sup>20</sup> Kimaan nɔɔe tee “Nn” Yennu mɔsona kur ni. Linba na paake te ki ti yet a “Mamɔmm” Yiisa Masia ni, ki li dont Yennu sann. <sup>21</sup> Yennu-e din gannit ki ti be ti kɔɔ, ki senn timm nan yimm fanu Masia ni. <sup>22</sup> Nɔɔe jii u Seyeen ki teen ti para ni, ki li tee dɔk ti paak, ki want nan u tan saa turit linba kur ki u bir guunit nawa.

<sup>23</sup> Yennu-e tee n siaradaano nan linba daan te ki n ki baar Korint i boor na tee n ki loon ki n dat i tubae. <sup>24</sup> Ti kan fit mukisi ki wannii yaa saa teen yada bianjinba, kimaan ti mi nan i mɔk yada ki see fanu, njaan ti tuun nani a tii wanti yaa saa teen bianjinba kii mɔk parpeenene.

## 2

<sup>1</sup> Li paake ki n ji daan lor n par ni nan n kan baar i boor ki tan turi parbiiri. <sup>2</sup> Li-i tee ki n baar ki tan biir i para, nmee ji saa penn n pari, see yimm nba ki n biir i para na. <sup>3</sup> Li paake ki n din sobi gbouŋ, maa n ki loon ki n baar ki tan la parbiir yimm nba bo saa penn n par na

boori. Kimaan n teen yada nan n parpeenn tee i mun yaa parpeenne. <sup>4</sup> Maa din sɔbin gboun na ki teeni, n din sɔbir nan parbiir bonchiann nan ninnyuute; li din ki tee a n loon ki n biir i para kaa, ɲaan n din loon ki yin bann lomm bonchiann nba ki n mɔk ki jiin i poe.

### *Ki jiin nyikinhab po*

<sup>5</sup> Li-i tee ki sɔɔ tun i yeno biit, u ki biir min kɔɔ kaa, ɲaan u biir i kuraewa, maa ki loon lin mantiki tee ninmɔnn na paake ki n yeen linba na. <sup>6</sup> I kure daan lakin ki dat u tubir, li paak, li jaja, <sup>7</sup> li ɲan ki yin nyik chabɔ, ɲaan kii maant u par, ki daa te ki u baa tarrri. <sup>8</sup> N barimie, ɲaant ki wun bann nan i bia daa loonɔ bonchiann. <sup>9</sup> Linba na paake ki n din sɔbin maa n laan i set saak n mɔb bonsiar kur ni-i. <sup>10</sup> Li-i tee ki i nyik chab wunba u biit, n mun nyik chabɔe na, kimaan mi-i nyik chabɔ linba paak, i paake te ki n nyik chabɔ Masia tɔonn; <sup>11</sup> a Sintaanii daa laat yaaki, kimaan ti mi u sɔnii nba tee bianjinba.

### *Ki jiin Trowas doo po*

<sup>12</sup> Maa din tan baar Trowas doo ni maa n mɔont Yiisa barɲanii nae, ki n bann nan Yennu set loot u toona sɔnjouk leɲa. <sup>13</sup> ɲaan maa din ki la n naa bik Taitus leɲ na paake ki n ki la pardɔonn; li paak ki n chab leɲ teeb, ɲaan gar saan Masedonia.

### *Masia nba teent nyannu bianjinba*

<sup>14</sup> Ti teen Yennu niipoouk, kimaan taa gaa nan Masia na paake ki ti nyant bonsiar kur. Yennu jiit a ti fiit Masia-e ki wann sɔɔ kur; ki u barɲanii bannu tee nan tulaarii nba nubir man

bianjinba nae. <sup>15</sup> Ti tee nan bonnunubmana nae, ki Masia jiiit ki wubint ki teen Yennu, ki li yat koo binba laat tinnu nan binba ki laat tinnu na kura. <sup>16</sup> Binba ki laat tinnu na boor, ti tee nan nubiru nba baat nan kuun nae, njaan binba laat tinnu na njanimiie, ti tee nan nubiru nba baat nan manfoor nae. Nmee jan nan toona manj? Soo kaa. <sup>17</sup> Ton, ti ki tee nan binba dia Yennu moomaan manj ki li tee kpinkpouj ki turib na kaa, njaan ti piak barmoniie, kimaan njoo Yennu-e tunt; li paak ki ti be u toonn, ki moontir u moomaan Yiisa yiikoo ni.

### 3

#### *Ki jiiin Yennu molorpaann na po*

<sup>1</sup> Ki linba na want nan ti bia want ti mone-e? Li tee talase nan soo n sob ti siara gbant ki turini-i? Koo ti gaar ti siara gbant i boor nan siab nba tuun bianjinba na-a? Aaii. <sup>2</sup> Yimme tee ti siara gbouj ki taab ti para ni, a soo kur n karin ki bann. <sup>3</sup> Li doo paanu nie nan yimme tee Masia gbouj manj ki u sob ki tunt nann; li ki tee gbouj nba ki nisaarik jii makmoonu ki sob tanpatlai paak kaa, njaan manfodaano Yennu Seyeenje sobir nisaarii para ni.

<sup>4</sup> Linba paak ki ti piak nna na tee taa teen Yennu yada Masia sann paak nae. <sup>5</sup> Ti ki want ti monj nan ti saa fit tun siar nan ti monj panj kaa, njaan Yennu sommir paake ki ti fit tuun toonn na. <sup>6</sup> Njooe din te ki ti jan nan u molorpaann toonn na; ki molorpaann manj ki tee Moses sennu nba ki u din sob na kaa, li tee Seyeenj yare;

kimaan sennu maŋ baat nan kuume, ŋaan ki Yennu Seyeen teent manfoor nba kaa gbennu.

<sup>7</sup> Yoo nba ki Moses din sob sennu maŋ tann paak na, li yooe ki Yennu maŋ yentsaakar sik ki nyirik Moses numm po; ki li nyiriuu paak, ki Israel teeb na ki fit goriiɔ. Ki li-i tee ki sennu nba din baat nan kuun ki bia gaar na din baar nan yentsaakar, <sup>8</sup> i mi a nlee ki Seyeen sonu kii be nan yentsaakar ki gariri? <sup>9</sup> Li-i tee ki sennu nba wann niib a bi mɔk biit na din baar nan yentsaakar, Seyeen sonu nba te ki niib tee niŋamm na be nan yentsaakar ki garira. <sup>10</sup> Sennu nba din tuu be nan yentsaakar na din tan koŋ li yentsaakara, kimaan yentsaakar nba yab garir na paak. <sup>11</sup> Li-i tee ki sennu nba din gar na din baar nan yentsaakar, Seyeen sonu nba sii be nan yoo nba kaa gbennu na, li yentsaakar sii yab bonchiann ki gar nna.

<sup>12</sup> Taa mɔk dindann nba na paake ki ti mɔk parcheenn. <sup>13</sup> Ŋaan ti ki tee nan Moses na kaa; ŋooe din jii chinchenn ki pin u numm po, a Israel teeb daa laat yentu nba be sennu nba yaa lin gar na ni. <sup>14</sup> Bi dudukit din ki yenti; bi-i karin Yennu gbounkperuk na yoo nba, li tee nan chinchenn maŋ bia daa dook bi dudukit nae. See wunba jii u moŋ ki tabin nan Masia-e ki chinchenn maŋ tuu dookit u dudukit. <sup>15</sup> Ki tan tuu dinna, bi-i karin Moses sennu na, chinchenn na bia daa dook bi para. <sup>16</sup> Ŋaan li-i tee ki niro ŋmat waa ti Yomdaanoie, chinchenn maŋ saa dokite. <sup>17</sup> Ki ti Yomdaano tee Seyeen nae; ki siaminba ti Yomdaano Seyeen na be, yent-n-moŋ be leŋe.

<sup>18</sup> Li paak, chinchenn maŋ ji ki dɔok ti numm po, ki ti laat ti Yomdaano nba mɔk ŋant bonchiann bianjinba, ki li kpintit ki ti naano, ki ti ŋant bia pukii yoo kura, ki ŋant maŋ nyi ti Yomdaano nba tee Seyeen na boore.

## 4

### *Mɔkint nba be yɔkmaanu ni*

<sup>1</sup> Yennu ninbatinu paake ki u jii toona na ki teen ti nii ni, ki li te ki ti ki mɔk kpinkpangbatuku. <sup>2</sup> Li paake ki ti yêt bunbɔnn ni toona, nan bontiteet nba baat nan fei, ti ki tuun ki dɔk niib na, ti ki lebit Yennu maan ki kpɔnn niibi, ŋaan ti mɔŋ be Yennu tɔɔnn ki mɔɔntir u maan paanu ni nan barmɔnii, a sɔɔ daa mɔk dudukiit ki jiin ti bontiteet po. <sup>3</sup> Li paak, li-i tee ki Yennu barnanii borie, li bɔr binba kpet Yennu sonu na boore. <sup>4</sup> Bi ki teen Masia yada, kimaan Sintaanii nba ki tingbouŋ na niib jiantirɔ na dɔkin bi dudukita. Nɔɔe dɔkint bi numm po a bi daa laat yentu nba dɔkit bi paak na. Li yentu nyi barnanii nba want Masia paŋ na boore; ŋɔɔe tee Yennu ninnaun. <sup>5</sup> Ti ki mɔɔntir ti mɔŋ po kaa, ŋaan ti mɔɔntir Yiisa Masia poe, a ŋɔɔe tee ti Yomdaano na, ŋaan want nan timme tee u toontunna ki teeni, u sann paak. <sup>6</sup> Yennu nba din yet a “Yentu n yent bunbɔnn ni na,” ŋɔɔe te ki u yentu na yentir ti para ni, a ti bann u yentsaakar nba tee bianjinba; li yentue yeen Yiisa Masia numm po.

<sup>7</sup> Naan timm nba mɔk Seyeen mɔkint na tee nan yɔkboba nae, ki li want nan paŋ nba gar paŋ

kur tee Yennu yare, li ki tee ti yar kaa. <sup>8</sup> Ti di biak bonchiann yoo kur, ɲaan li kan fit nyanniti; ti tuu kɔŋ sommir sianyoo, ɲaan ti ki kɔŋit dindann; <sup>9</sup> bi dintit biak, ɲaan Yennu ki nyikititi; bi lut tinj ni, ɲaan ki fit kpiiti; <sup>10</sup> Yiisa kuun na be ti gbanant ni yoo kur, a lin te ki u manfoor na n mun nyi paanu ti gbanant ni. <sup>11</sup> Yoo nba ki ti fo na, ti be kuun nuu nie Yiisa paak, a u manfoor nba be ti gbanant nba yaa lin tan kpo na ni n nyi paanu. <sup>12</sup> Ki ti jii ti mɔŋ ki chab kuun, a yimm n la manfopaann.

<sup>13</sup> Li sob Yennu gbounj ni a “Maa teen yada na paake ki n pak,” ki ti mun mɔk Seyeen nba din te ki niro manj teen yada na, li paak, ti mun teen yadae ki piak na. <sup>14</sup> Kimaan ti mi nan Yennu nba din fiin ti Yomdaano Yiisa kuun ni na, ɲooe tan saa fiin timm nan yimm nba waa Yiisa manj kuun ni mun, ki baar nant u mɔŋ boor. <sup>15</sup> Kimaan linba na kur be a lin somm yimme, ki niib bonchiann nba tan saa la Yennu ninbatinu na tan saa turo niipoouk bonchiann, ki dont u sann.

### *Ki jiin yada po*

<sup>16</sup> Li paake ki ti ki mɔk kpinkpangbatuku; halii nan ti gbanant nba kpet saa na gbaa, ɲaan Yennu pantir ti seeie daar n tuu daar. <sup>17</sup> Li paak, biak waamina nba ki ti di, ki li kan yukir nae, tan saa baar nan parpeenn nba yab ki kaa gbennu ki turit, ki parpeenn manj tan sii yab ki gar ti biak na bonchiann, <sup>18</sup> kimaan ti baka kaa linba ki ti laat na po, ɲaan ti baka be linba ki ti ki laat na poe; kimaan linba ki ti laat na, li kan yukiri



ki li saa gar, ɲaan linba ki ti ki laat na ɲarin tan sii be nan yoo nba kaa gbennu.

## 5

<sup>1</sup> Tɔn, ti mi nan gbanant nba ki ti mɔk mɔtana na-i tanɪ kpo, ti mɔk ɲaak\* nba ki Yennu saa turit sanpaapo, ki li ki tee nisaarik kaa maa ɲaak maɲi, ki li bia tan sii be nan yoo nba kaa gbennu.

<sup>2</sup> Li paak, ti ji jikire ki guu daar nba ki Yennu tan saa jii ti sei ki koon ɲaak maɲ ni. <sup>3</sup> Kimaan ti-i tanɪ koo leɲ, ti sei ji kan mi kɔɲ binbeboori.

<sup>4</sup> ɲaan ti sei nba daa woo gbanant na ni na, ti kuriie. Li ki tee a ti ji ki loon gbanant na benu kaa, ɲaan ti loon sanpaapo gbanant na, a li daar manfoor na n tan nak kuun ki lin gbenn.

<sup>5</sup> Yennu-e ɲammit ki ti teen siir lebitu na po, ki turit u Seyeeɲ, ki li wantit linba ki u tan saa turit na po.

<sup>6</sup> Li paak, ti mɔk parcheenn yoo kura, ki bann nan ti sei-i be tingboun na gbanant na ni, ti kaa sanpaapo, ti Yomdaano boori; <sup>7</sup> kimaan ti waa yada sɔnue, ti ki waa linba ki ti ninbinn laat na kaa. <sup>8</sup> Ti mɔk parcheenn ki sunman tin nyi gbanant na nie ki kun ti Yomdaano boor.

<sup>9</sup> Li paak, taa be tingboun na ni, koo u boori, ti ninbinn mɔn tin penn u pare. <sup>10</sup> Kimaan ti kur binbenɲ tan saa nyi paanu Masia tɔɔnn, buut daar, ki sɔɔ kur tan saa gaar paauk nan u toona nba tuu tee bianɲinba tingboun na ni nae, laa tan ɲani, laa bii, li fan nana.

---

\* **5:1** 5.1 “Naak” paak tee gbanant nba ki Yennu saa turit yendoun ni.

*Taa kpant Yennu yɔɔsnba Masia paak bianjinba*

<sup>11</sup> Taa baakit ti Yomdaano bianjinba na, li paak ki ti daak niib a bii waau. Yennu mi ti binben nba tee bianjinba; ki n mɔk dindann nan i mun bia mi i para ni, n binben nba tee bianjinba. <sup>12</sup> Ti ki dont ti mɔŋ kaa i boori, ŋaan ti loon ki tin turi yaake ki yin fit faa parbia ti paak, ki pak tur binba gorii nisaarik nanyer po ki mɔk yuugontir u paak, ŋaan ki gorii u binben na. <sup>13</sup> Ti-i tee ninkanmanjit dammiie, Yennu paake ki ti tee nna; ŋaan ti-i munii kii tee ninkanmanjit dammi, i paake te ki ti ki tee nna. <sup>14</sup> Masia lommu diat; taa ji bann nan ŋɔɔ niyenɔkɔɔe din gaar sɔɔ kur paak ki kpo na, li want nan sɔɔ kur kpo nanɔe. <sup>15</sup> Ŋɔɔe din gaar sɔɔ kur paak ki kpo, a binba fo na daa be ki tur bi mɔŋ-i, ŋaan kii be ki tur wunba din gaar bi paak ki kpo ki bia fiir kuun ni nae.

<sup>16</sup> Li paak, ti ji ki gorii niro nanyer po kaa; taa din got Masia nanyer po bianjinba na, ŋaan ti ji ki goriio nna kaa. <sup>17</sup> Li paak, niro nba be Masia ni, li yɔɔ ji tee nipaamɔɔe; u binbenkperik kur ji gara; gotir man, binbenpaan ji baar li yɔɔ niwa. <sup>18</sup> Linba na kur nyi Yennu boore. Ŋɔɔe ŋammitit Masia paak, a ti ji daa tee u datai, ŋaan kii tee u yɔɔsnbae, ki bia turit u toona a ti te ki niib n mun teen u yɔɔsnba. <sup>19</sup> Li want nan Masia nba din kpo na, ŋanne tur Yennu sonu a wun teen tingbouŋ na niib u yɔɔsnba, ki nyik chab bi toonbiit, ŋaan jii u barnanii nba wantib bianjinba ki u teeb u yɔɔsnba na, ki teen ti nuu ni.

<sup>20</sup> Li paak ki ti ji tee Masia taatara ki Yennu te

ki ti yi niib. Masia paak ki ti barimi a yin tunn ki teen Yennu yɔɔsnba. <sup>21</sup> Kimaan ti paake ki Yennu din te ki Masia, wunba ki mi tun biit na, set timm biitdamm seenu ni, a tin la yentinu binben ɲɔɔ Masia ni.

## 6

<sup>1</sup> Li paak, timm nba tuun Yennu toona u sommir paak na, ti barimie, i daa te ki u ninbatinu na tee yanni. <sup>2</sup> Kimaan Yennu yet a:

“Yoo nba din tan jaŋ na,  
n din gbiint i miaruwa.

Ki yoo nba din tan jaŋ nan ki n tinni na,  
n din tinniwa.”

Gbiintir man, dinnae tee daar nba jaŋ. Dinnae ki yaak be ki niib saa la tinnu maŋ.

<sup>3</sup> Timm ɲarin ki tuun linba saa gɔɔr sɔɔ Yiisa Masia sɔnu ni, ki sɔɔ n tan mann yet a ti toona ki ɲani. <sup>4</sup> Ti binben nba tee bianɲinba nae want niib nan ti set tee Yennu toontunnae, kimaan ti laat biak, nan mukisuk, nan maan, ɲaan lek di sukuru li kur na ni. <sup>5</sup> Niib dia kpaasa ki boot, ki loontit dansarii; ti paak ki niib fu fuut; ki ti lek tuun toona ki ki gɔɔnt nyiɔku, ki ki di yenn yoo gbaa. <sup>6</sup> Ti tee popeendamme, ki mi Yennu mɔmaan, ki mɔk sukuru nan burchint, ki gbee nan Yennu Seyeen, ki loon niib, <sup>7</sup> ki beerib Yennu mɔmaan nba tee barmɔnii na, ki mɔk ɲɔɔ Yennu paŋ; ki bia mɔk yentinu binben nba tee jatiat nba be ti niidiitu ni, nan ti niigaŋ ni na. <sup>8</sup> Nisiab teent baakir, ki siab mun sukiit, siab biir ti sana, ki siab mun piakit; siab yeen a ti lin kpann niibe, ɲaan ki ti piak barmɔniie. <sup>9</sup> Ti ki mɔk sann niib

boori, n̄aan ti m̄ok sann Yennu boor. Kuun tiin ki waate, n̄aan ki ti lek m̄ok manfoor; Yennu-e te ki biak baatit, n̄aan u ki te ki li kpiti. <sup>10</sup> Ti m̄ok parbiir n̄arin, n̄aan Yiisa paak ti m̄ok parpeen̄ne yoo kura. Ti tee tariie, n̄aan timme te ki niib bonchiann tee m̄okita Yennu boor. Ti ki m̄ok tingboun̄ na m̄okint siari, n̄aan ti m̄ok linba gar m̄okint kura. Linba na kura want nan ti set tee Yennu toontunnae.

<sup>11</sup> Yimm Korint doo ni teeb, ti poŋ beti ti n̄ook ni barii kura. Ti looni bonchiann; <sup>12</sup> li ki tee timm kaa ki loonini; yimme ki loonit. <sup>13</sup> N piak teeni nan nir̄o nba bo saa pak u tiŋŋ waas bianjinba nae; yii loonin man nan maa looni bianjinba na.

*Li mi binba ki teen Masia yada na po man*

<sup>14</sup> I daa m̄ok weinanleeb nan niib nba ki teen Masia yada na. Linba n̄an nan linba ki n̄an saa fit lakin be nan leeba-a? Yentu nan bunbonn̄ saa fit lakin taan m̄ob ki be nan leeba-a? <sup>15</sup> Masia nan Sintaanii saa fit taan m̄oba-a? Nir̄o nba waa Yiisa sonu nan wunba ki waa-r saa fit taan binben-yeŋa-a? <sup>16</sup> Yennu diiuk nan poochianfeek tee yomme-e? Aaii. Timme tee diiuk ki tur manfodaan̄o Yennu, kimaan ŋoŋ Yennu din yet a:

“N sii be n niib para nie, kii be namm.  
N sii tee bi Yennu-e, ki bi mun tee n niib.”

<sup>17</sup> Li paak ki Yennu bia yet a,

“Bokitir i m̄oŋ man,  
ki nyi tingboun̄ na niib sinsuuk ni,  
ki nyik biit kur tumu, ki n saa gaari.

<sup>18</sup> N sii tee i Baae,  
ki i tee n naasimm nan n sapaamm.

Min, Yabint Yennu-e pak na.”

## 7

<sup>1</sup> N naa walonkai, Yennu nba senn mɔsona ki turit na paak, yi ŋaan ki ti nyik linba kur tee toonbiit, nan linba kur tee dudukbiit, ŋaan kii tiin Yennu, kii tee popeendamm nan barmɔnii.

### *Pɔɔl parpeenn labaar*

<sup>2</sup> Ii loonit man. Ti ki mi tun sɔɔ bonbiiri, koo ki tun siar ki biir sɔɔ, koo ki ŋmab sɔɔ. <sup>3</sup> N ki sɔb nna a n biiri kaa. Ti lek looni, nan maa poŋ beti bianjɪnba na. Mi-i lekii kpo koo mii be n manfoor ni, ŋaan ti lek sii looni. <sup>4</sup> N ki mɔk birsuk i paaki; n mɔk yuugontir nani, ki n par mei i paak bonchiann. Ti biak dinu kur ni, ŋaan n mɔk parpeenn nani.

<sup>5</sup> Taa din baar Masedonia ti din ki fit foi. Ti din la mukisuk lokir kur po; niib din kɔn nant Yennu mɔmaan na paak; ki janmaanii din be ti para ni, <sup>6</sup> ŋaan Yennu nba maant binba mɔk parbiir para na daan te ki Taitus baar ti boor, ki tan maan ti parawa. U baaru ti boore daan te ki ti para maak. <sup>7</sup> Nann kuukɔɔ kaa daan maak ti para, ŋaan u bia daan betit i binbeŋ nba tee bianjɪnba; ŋanne bia daan te ki ti para maak. U daan betit a i ninbinn mɔn nan ki i bia lan, a i mɔk parbiir i toonbiit paak, ki i ninbinn mɔn nan ki i sak n mɔb. Linba nae te ki n mantik mɔk parpeenn.

<sup>8</sup> Maa din sɔb gbouŋ nba ki turi na, li gbouŋ din turi parbiir waama, ki n mɔ kɔɔbia i parbiir maŋ paaka, mɔtana n ji ki mɔ kɔɔbia li paaki, <sup>9</sup> ŋaan n ji mɔk parpeenne. I parbiir maŋ paak kaa te ki n mɔk parpeenni. I parbiir nba te ki i nyik i

toonbiit na paake ki n mək parpeenn. Yennu-e din te ki i para biir i toonbiit paak, li paake ki li gbouŋ mək nyoot turi. <sup>10</sup> Kimaan Yennu-i te ki nisoo la parbiir u biit paak, ŋanne saa te ki wun nyik u biit tumu ki la tinnu, ki li kan mi biir u par jikii; ŋaan tingbouŋ na parbiir ŋarin baat nan kuume. <sup>11</sup> Yennu nba te ki i la parbiir na, i moŋ la bianŋinba ki li turi nyoota: i baka be Yennu labaar ni, ki i bia loon yin wann nan i ki mək biiti; i bia tiin Yennu; i loon ki i bia lan; i bia loon yin tun Yennu loomm; i poŋ dat biitdaano na tubira. Yaa tun nna maŋ, li set want nan i ki mək bisiat maan maŋ ni.

<sup>12</sup> Maa din sob gbouŋ maŋ ki turi na, li ki tee nirō nba tun toonbiit na paak kaa ki n din sobiri, li bia din ki tee nirō nba ki u biirō na paak kaa ki n sobiri. N din loon yin bann i baka nba be ti po bianŋinba Yennu boore, ŋanne din te ki n sobir.

<sup>13</sup> Mōtana ti para maak i paaka.

Ti bia mək parpeenn bonchiann, kimaan Taitus daan la pardoonn i kur paak, ki li daan turo parpeenn, li paake te ki ti mun mək parpeenn.

<sup>14</sup> N poŋ din paki u boor niwa, ki i ki te ki n dii fei. Taa tun beeri labaar nba kur na, li tee barmōniie. Nnae mun, taa din piaki Taitus boor ni na, ti din piak mōniie. <sup>15</sup> U tiar yaa daan gaaro saauŋ bianŋinba ki baako, ki bia baak waa beti linba ki saakir na. ŋanne te ki u mantik looni.

<sup>16</sup> N mi nan i lek bia sii ŋammit tuun linba kur ŋane. Li paake ki n mək parpeenn bonchiann.

### *Yiisaweira piinii labaar*

<sup>1</sup> Ti naa waas, ti loon ki yin bann Masiaweira nba be Masedonia na nba tur Yennu piinii bianjinbae. <sup>2</sup> Bi din dii biak ki la bikinn nan namu bonchiann, n̄aan lek m̄ok parpeenn. Bi namu ni n̄aan bi din wann burchint ki tur Yennu piinii bonchiann. <sup>3</sup> N saa fit teen bi siara nan baa din m̄ok linba, bi din turo nan bi paŋ terike, ki poŋ din saa gar baa bo saa turo bianjinba gbaa; <sup>4</sup> ki din barint a tin gaar bi piinii maŋ ki tur Yennu niib nba tee tarii na. Li din tee bi yanboote nan bin turib. <sup>5</sup> Bi din tur ki li gar taa poŋ din dukii baa saa tur bianjinbawa. Sinsinn bi din jii bi m̄oŋe ki tur ti Yomdaano, ki lian fit jii bi m̄oŋ ki turit, Yennu loomm ni. <sup>6</sup> N̄aan yimm n̄arin, Taitus-e daan te ki i piin gaan likirii ki teen Yennu. Ti daan beto a wun yabir ki sommi ki yin tun likirii toona maŋ kur ki gbenn nan lom̄m. <sup>7</sup> Ton, i teen Yiisa yada, ki mi u labaar fanu, ki fit piak leeb u m̄omaan, ki waau nan ninm̄onn, ki bia loonit; yaa tun linba na kur nan ninm̄onn na, ti loon ki yii tuun toonjana maŋ mun nnae nan ninm̄onn.

<sup>8</sup> Maa yeeni linba na, li ki tee n mukisi kaa a yin turi; n wanni Yennu nisiab numm nba m̄on bianjinba nan bin turo piinii, kimaan n loon ki n bann yaa loono bianjinbae. <sup>9</sup> I mi ti Yomdaano Yiisa Masia nuu nba yaa bianjinba. U din tee m̄okitooe, n̄aan ki i paak ki u kpant tarik, ki u tarik kpantu maŋ paak te ki yimm ji teen m̄okita. <sup>10</sup> Maa saa beti m̄obonn nba tee nnae: yaa din piin ki gaan likirii nba binn po na, li n̄an ki yin gaar ki tont m̄otana. Yimme din doŋ leeb ki loon

Yennu piinii turu, ki bia piin ki teen piinii maṅ. Ii yabir i mɔṅ paak ki gaarir tont. <sup>11</sup> I ninbinn din mɔn nan piinii maṅ turu. Ii ṅaan ki i ninbinn-ii biaki mɔn piinii maṅ turu paak, nan yaa saa fit tur bianṅinba, ki gaar linba tenn na tont. <sup>12</sup> Niro nba loon ki wun tur Yennu piinii, ki turo nan waa mɔk bianṅinba, Yennu saa gaara. Yennu ki loon ki niro n turo ki gar waa mɔk bianṅinba. <sup>13</sup> N ki loon ki yin tur leeb ṅaan di fara li paaki. N loon ki i kur-ii jame. <sup>14</sup> Linba te ki n yeen na tee nnae: yaa mɔk ki li yab mɔtana na, li ṅan ki yin somm binba ki mɔk na, ki li-i tee ki i mun tan ki mɔk yoo nba, ṅaan ki bi mun mɔk ki li yab, bi mun saa sommiwa. ṅanne saa te ki i kur jan, <sup>15</sup> nan laa sob Yennu gbouṅ ni bianṅinba na a, “Wunba din tokir bonchiann na, u din ki dii tenni; ki wunba tokir waaminna na, li din ki pɔto.”

*Taitus nan u toontunleeb labaar*

<sup>16</sup> Ti piak Yennu nan waa te ki Taitus baka be i ni nan ti baka nba mun be i ni bianṅinba na; <sup>17</sup> kimaan taa barimo a wun saan i boor na, u saka; ki u mɔṅ numm mɔn nan wun baar i boor; ki u yaa wun baar nan u mɔṅ loomme. <sup>18</sup> Ti tan saa te ki ti naa bisoo n weiɔ ki baar i boor. Ti naa bik maṅ nba mɔontir Masia barnanii bianṅinba na paak te ki Masiaweira kur piako bonchiann. <sup>19</sup> Bi bia ganno a wuu waa-t ki tin somm Yennu niib nba tee tarii na. Linba nae saa dont ti Yomdaano sann, ki bia wann nan ti set loon ti leeb sommir. <sup>20</sup> Ti tan saa jii likirii bonchiann ki saa sommib, ṅaan ti ki loon ki soo n pak biir ti sann a ti loon likirii na ni siari.



<sup>21</sup> Yennu mi nan ti tuun nan li sonu, ki ti loon niib n mun bann nan ti set tuun nan li sonue. <sup>22</sup> Li paak, ti saa tun ti naa biloo mun ki wun chian Taitus nan u weinanloo ki bin baar i boor. Yoo kur, ti laat ti naa bik man binben nba tee bianjinba, ki bann nan u numm set mon Yennu toona paak, kimaan u ki mok birsuk i paaki. Nanne te ki u mantik loon ki wun saan i boor. <sup>23</sup> Nisiab-i boi-i Taitus po, yin betib nan u tee n toontunnanlooe, wunba sommitin ki n beeri Masia barjanii. Nisoo-i boi-i ti naa waas nba waa Taitus na po, yin beto a bi tee Masiaweira toontunnae, ki bi binbenjan paake te ki niib dont Masia sann. <sup>24</sup> Ii wann ti naa waas man nan Masiaweira kura yaa loomm bianjinba, ki bin bann nan taa daan piaki bianjinba bi boor na tee moniie.

## 9

### *Leeb sommir labaar*

<sup>1</sup> Li ji ki kpaa talas ki n sob gbounj ki beti bianjinba ki i saa somm Yennu niibi. <sup>2</sup> N mi nan i loon ki yin sommib. N daan paki Masedonia teeb boor, ki betib bianjinba ki yimm nba be Akaya yent ni na din loon yin somm Yennu niib binn po. I numm nba din mon Yennu niib sommir paak na, li din te ki Masedonia teeb mun loon bin sommibe. <sup>3</sup> N loon ki n te ti naa waas na n baar i boor nie ki la nan taa piaki bianjinba na set tee moniie; i be nan maa yetib bianjinba na ki teen siir ki tur likirii na. <sup>4</sup> Nna-i kaa, Masedonia yent ni niib man-i tanj wein ki baar i boori, ki soo ki i daa ki teen siiri, li saa dinnin feiwa; ki li

kii tee min kuukoo kaa saa di fei, ti kurae saa di fei, kimaan ti daan paki bi boor niwa. <sup>5</sup> Li paak, n dukin nan li njan ki n barin ti naa waas na, ki bin gar n toonn ki baar i boor, ki sommi ki yin gaar likirii man, nan yaa daan senn i mōsonn bianjiba na, ki mi-i tanji baar yoo nba man la ki i poŋ gaar tonta. Nanne saa wann nan i tur nan i moŋ loommo, njan soo kaa mia-i ki i turi.

<sup>6</sup> N beerie, wunba bur waaminna tan saa jaan waaminnae; ki wunba mun bur saama tan saa jaan saame. <sup>7</sup> Wunba kur dukin u par ni a wun pi piinii bianjiba, li yoo n pi nna, ki daa piin nan parbiiri, koo ki pi nan mukisuku, kimaan Yennu loon niro nba piin piinii nan parpeenne. <sup>8</sup> Yennu saa fit turi bont kur, ki i kan koŋ siari. I saa la ki lin gar yaa loon bianjiba, ki fit somm binba kur ki mōk na, <sup>9</sup> nan laa sob Yennu gbouŋ ni a “Wunba nuu njan yab ki teen tarii, u burchintuk kan mi gbenni.” <sup>10</sup> Yennu nba teen niib bonboorii ki bi buur, ki bia teemm jeet ki bi di na, nōoe saa turi bont kur ki lin jani ki saa gar, ki yin ji mantik somm niib. <sup>11</sup> Li-i tee ki i sommit niib bonchiann, Yennu saa sommi bonchiann. Yaa turit piinii a ti somm leeb na, niib bonchiann saa pak Yennu, i piinii man paak. <sup>12</sup> Li-i tee ki i sommit Yennu niib ki teemm linba ki bi ki mōk, li saa te ki niib bonchiann n tur Yennu niipoouk. <sup>13</sup> Li-i tee ki i sommitib, njan saa wannib nan i set gaar Masia barjanii na ki sakira, ki i nuu yaa ki i chentir namm, ki bia chentir nan niib kur yaa mōk linba. Nanne saa te ki bin dont Yennu sann, <sup>14</sup> ki miaro ki turi, kii looni, kimaan Yennu-e te ki i nuu yaa bonchiann.

15 Njaant man ki tin tur Yennu niipoouk, kimaan njooe turit u Bija nba gar piinii kur na.

## 10

### *Bianjinba ki Pɔɔl kɔn u toona paak*

<sup>1</sup> Tɔn, i siab yeen a mi-i be i boor ni, n ki mɔk par, a njaan mi-i saan ki be siarpo, n tuu mɔk pare, ki ji sobin gbant ki kpaani. Min Pɔɔl tɔn, n mɔk baakir ki be soon nna nan Masia nba be bianjinba na, ki barimi a yin njaan i binben, <sup>2</sup> ki mi-i tanj baar i boor yoo nba, n kan dat i siab tuba. N mi nan mi-i baar i boor yoo nba, see ki n dat binba yaa ti waa tingbouŋ na niib nba waa linbae na tuba. <sup>3</sup> Li tee barmɔniie nan ti mun lek tee nisaariie, njaan ti ki kɔn kunkɔnn nba tee nisaarii yar kaa. <sup>4</sup> Li paak, ti ki jikit nisaarik paŋ kaa a ti kɔn li kɔnni, ti jikit Yennu paŋ nba saa biir Sintaanii paŋ kur nae ki kɔn. Ti piak ki nyant niib nba ki saak Yennu mɔmaan nae, <sup>5</sup> ki nyant niib nba mɔk karinbaanii ki dukii a bi mɔk yan ki gar Yennu na, a ti te ki sɔɔ kur dudukit n gaar Masia. <sup>6</sup> Ti-i bonni mi binba be i sinsuuk ni ki sak Yennu mɔb na, ti bo saa dat binba ki sak na tubae.

<sup>7</sup> Yimm gorii nisaarik numm po kuukooe. Sɔɔ-i be i sinsuuk ni ki yaa u tee Masia yooe, li yoo n tiar nan ti mun tee Masiaweirae nan waa tee bianjinba na. <sup>8</sup> Ti Yomdaano din turin yudantuk na a n sommie ki yin fit weiɔ fanu, u din ki turin a n biiri kaa. Mi-i lekii nyu bara ki gar maa bo saa nyu bianjinba, njaan n kan di fei. <sup>9</sup> I daa dukii nan n loon ki n sɔb gbouŋ nba saa jeenie. <sup>10</sup> Nisiab yeen a n sɔbin gbant ki li tee nan pandaansɔɔ

yare na, a ɲaan mi-i taɲi baar i boor yoo nba, n ji tuu ki mɔk paɲ, a ki n mɔbona na ji tuu tee yanne. <sup>11</sup> Li ɲan ki li niib n bann nan taa sɔbin ti gbant ni a ti saa tun bianjinba na, ti-i taɲi baar yoo nba, li bianje ki ti set saa tun.

<sup>12</sup> Mamɔmm, ti ki loon ki tin jii ti mɔɲ ki bikin nan siab nba dont bi mɔɲ na, ki bia ki loon ki tii tee nan bi yemm na. Bi ki mɔk yami, bi gorii leeb binben ɲba tee bianjinbae ki bikii nan bi mɔɲ. <sup>13</sup> ɲaan timm ɲarin, ti ki dont ti mɔɲ ki gaar ti toona nba tee bianjinba. Ti mɔk yuugontir toona nba ki Yennu nyinnit ki turit na paake. Taa beeri Yennu mɔmaan nba nae tee toona maɲ yenn-nba. <sup>14</sup> Ti din dɔɲ siabe ki baar i boor ki beti Masia labaar. Taa tuun linba nae tee Masia nba sennit linba a tii tuun. <sup>15</sup> Ti ki loon tin gaar paku siab toona paaki. Ti mɔk dindann nan i saa ɲamm teen Yiisa yada bonchiann, ki sommit ki tin ɲamm tun Yennu toona bonchiann i boor, nan waa jiiir ki turit a ti tunn bianjinba na. <sup>16</sup> Ki ti saa fit saan doi nba fɔk ki gar i doo na, ki mɔɔnt li barɲanii. Ti kan saan siaminba ki siab poɲ tun na, ti ki loon tin gaar paku nisiab toona paaki.

<sup>17</sup> Li sɔb Yennu gbouɲ ni a, “Wunba faa parbiir, li ɲan ki wun faa parbiir linba ki Yennu tun paake.” <sup>18</sup> Kimaan niro nba piak u mɔɲ, li ki want nan Yennu numm gboou kaa; ti Yomdaano-i piak wunba, ɲanne want nan Yennu numm gboou.

## 11

*Ki jiiin Pɔɔl nan faak toomiinba po*

<sup>1</sup> Mi-i piak jatiie, ɲaan yimm n lek yabir i moŋ ki di sukuru nanin. <sup>2</sup> N looni bonchiann nan Yennu nba looni bianɲinba na. I tee nan sapaamo nba ki mi joo nae, ki n loon ki n jii-i ki tur Masia ki yii waa ɲoo kuukoo. <sup>3</sup> N moƙ jijeet i paak a niib tan saa mann kpanni a i ji daa waa Masia fanu, nan Sintaanii nba din kpann Adam ɲaapoo Iif bianɲinba na. <sup>4</sup> Nisoo nba tuu baar i boor ki beeri labalia nba ki tee Yiisa labaar nba ki ti din beti na, bee teen ki i tuu di sukuru nan li yoo? Bee teen ki i gaan maan nba ki tee Yiisa barɲanii, ki bia gaan seek nba ki tee Yennu Seyeenji?

<sup>5</sup> Niib nba kpanni a bi tee Yiisa toomiinbae na, n ki dukin bi garimi. <sup>6</sup> Li-i lekii tee ki n ki mi barii paku fanu, ɲaan n mi Yennu moɲmaan na nan li sonu, ki yoo kur ti bia wanti li kura paanu ni.

<sup>7</sup> N lek sikin n moŋe maa n donni, kimaan maa din beti Yennu barɲanii maŋ na, n ki gaar i siar li paaki. Ki maa din tun nna maŋ, n moƙ biite li paaki-i? <sup>8</sup> Maa din beeri Yennu moɲmaan na, Masia nisiabe din tuu pan li paak, ɲaan ki yimme bo saa turin li sommir. <sup>9</sup> Maa din be i boor ni yoo nba, ki ki moƙ siar na, ɲaan n lek din ki mukisi maa yin sommin nan siari. Ti naa waas nba din nyii Masedonia nae baar nan bont kur nba ki n loon. Maa lek din be bianɲinba li yoo na, n bia lek sii be nnae; n kan mukisi a yin sommin nan bonsiari. <sup>10</sup> Mamomme ki n piak Masia paak, n kan mi mukis i soo, Akaya tingbouŋ ni lokir kur po, a li yoo n sommin nan bonsiari. <sup>11</sup> Bia paake? Linba na want a n ki loonie-e? Yennu ɲarin mi nan n looni.

12 N lek bia sii beeri Yennu maan na, n̄aan n kan mi boi-i li paatii po. Li paak, kpinkpannii damm maŋ nba gaan paatii na kan fit donn bi m̄oŋ ki yet a bi mun tee nan timm na. 13 Li nibooru kpannie a bi tee Masia toomiinba, n̄aan bi ki tee u toomiinba kaa. Baa tuun bianjinba na, bi kpannie. 14 Baa tuun nna maŋ, i daa te ki li teei yaarlituku; nnae ki Sintaanii tiŋŋ nant u m̄oŋ yentu malaka. 15 Li paak, Sintaanii toontunna-i kpann a bi tee Yennu yab, i daa te ki li teei yaarlituku. Yennu-e tan saa dat bi tuba nan bi toona nba janib bianjinba.

*Pɔɔl biak dinu Masia paak labaar*

16 N saa n̄amm betiwa, i daa dukii nan n tee jatuku. Li-i tee ki i lek dukii nnaie, n̄aan yin di sukuru nanin ki n pak n m̄oŋ waaminna. 17 Maa yaa n beti linba na ki tee ti Yomdaano maan kaa. Mi-i piak n m̄oŋ maan, n set piak nan n tee jatuk nae. 18 Niib bonchiann want bi m̄oŋe; li paak, n mun saa wann n m̄oŋa. 19 I dukii a i m̄ok yame, n̄aan bee teen ki i di sukuru nan jatit, ki m̄ok parpeenn nammi? 20 Maa yeen linba na tee nnae: nisɔɔ-i soori ki teeni u daaba, ki n̄mab i bont, ki kpanni, ki m̄ok karinbaanii, ki pebiti tanpakii, n̄aan i tuu di sukuru nan li yɔɔe. 21 Taa din ki teeni nna na paake ki i biir ti sana a ti ki m̄ok paŋ amii nlee?

Nisɔɔ-i m̄ok par ki want u m̄oŋ, n mun saa teen nnae. N set piak nan jatuk nae. 22 Kpinkpannii damm maŋ-i yi bi m̄oŋ Hiibru\* booruie, n

---

\* 11:22 11.22 Juu teeb sanleere tee Hiibru teeb ki bia tee Israel teeb.

mun tee Hiibru nirœ; bi-i yi bi mɔŋ Israel yabie, n mun tee Israel yooe; bi-i tee Abraham yaabonaie, n mun bia tee yenœ; <sup>23</sup> bi-i yi bi mɔŋ Masia toontunnaie, mine mantik tuun; (n piak nan jatuk nae; teentin gafara man;) mine set tun Masia toona bonchiann nan barmɔnii, ki koo dansarii bonchiann. Niib boon kpaasa bonchiann Masia paak. N din la ninbɔŋ ki per kuuma. <sup>24</sup> Taar munŋmu ki Juu teeb boon kpaasa piintaa nan ŋanyia. <sup>25</sup> Rom teeb din boon lanbana taar muntaa. Niib din jaatin tana sianyoo. Ŋarint din libit chaan nanin nyun ni taar muntaa; ki yontunmunn nan nyotummunn ki n be ŋarin-yakir paak, mɔkgbeŋir ni. <sup>26</sup> N din tuu saa sɔnii, ki laat nyungbeeuk ninbɔŋ, ki bia laat ninbɔŋ fat-teeb boor, nan n tiɔŋ niib boor, nan boorganu boor, ki bia laat ninbɔŋ digbangbeŋa ni, nan muuk ni, nan mɔkgbeŋa ni, nan nisiab nba kpann a bi tee Masiaweira na boor. <sup>27</sup> N din set tuun Yiisa Masia toona nan ninmɔnn, ki di biak, ki ki gɔɔnti. Kon nan nyunnyukuru din tuu soorin; ki n bia lorin mɔb yoo nan yoo; ki waat son; ki n bongbabkar ki janitimi. <sup>28</sup> Linba na kuukoo kaa din tee linba nba ki n laati; n din tuu mɔk parbiire daar kura Masiaweira kur paak. <sup>29</sup> Nisoo-i tee yadapoorin daano, li mun tuu baŋ n kpinkpante; nisoo-i te ki u loo tun toonbiit, n par tuu di muue.

<sup>30</sup> Mi-i faa parbiir, n sii faa parbiir n kpinkpant baŋu paake. <sup>31</sup> Ti Yomdaano Yiisa Baa Yennu, wunba yen paku nan yoo nba kaa gbennu na, ŋooe mi nan n piak barmɔniie. <sup>32</sup> Maa din be Damaskus doo ni, Bat Aretas yoo na, doo maŋ ni

saakoo din loon wun soorime, ki te ki lanjimanba see doo manj tammob ni, ki guu a bin soorin. <sup>33</sup> Nanne ki n yoonsba jiin ki kpeenin kpanchib-gbenir ni, ki nyinin takoru nba be doo manj joonn ni na, ki n nyii joo manj nuu ni.

## 12

### *Bakitnant nba ki Pɔɔl din la na labaar*

<sup>1</sup> Li kpaa talas ki mii lekii mok parbifaant, nnaan li ki mok nyooti. Motana n saa beti ti Yomdaano nba wannin bakitnant nba, ki kat labaar nba ki wannin. <sup>2</sup> Li bina piik nan nannaena, ki Yennu din jiin ki donnin u boor sanpaapo; n ki fit bann waa din jii n seek kooe ki doo nann, koo u din jii n seek nan n gbanante, hoo kuukooe mi. <sup>3-4</sup> Maa mi linba tee waa din jiin ki donnin u boor sanpaapo, Paradais\* ni nae. Leje ki n din gbat labasia nba ki n kan fit kumii soo; Yennu kan sak man kumiiri. <sup>5</sup> Li bakitnauj bont kuukoo paak ki n sii mok parbifaant; n kan pak n monji; see n butuŋ po. <sup>6</sup> Mi-i loon ki n faa parbiir, nnaan n kii tee nan jatuk na kaa, kimaan mamomm kooe ki n kpan sii piak; nnaan min poŋ ki loon ki n faa parbiiri. Min ki loon ki nisoo n pakin ki gar paku nba jan nanin. N loon ki bin got n binben nba tee bianjinbae, ki gbat maa piak bianjinba, li poorpo ki bin bann maa tee nibooru nba.

<sup>7</sup> Yennu nba din wannin bakitnant bonchiann na, nnaan u ki loon ki n donn n mon li paaki, ki din te ki mukisuk nyii Sintaanii boor ki baarin. Li mukisuk yiarin nan kunkonn nba tuu nmuu niro

---

\* **12:3-4** 12.3 Yendouj sanleere tee Paradais.



ki li yiaro bianjinba nae. <sup>8</sup> N miar ti Yomdaano taar muntaa maa wun nyinn li mukisuk n ni, <sup>9</sup> naan u lek ki saki, ki betin a “N sommir na saa te ki a nyann mukisuk maɲa, kimaan wunba ki mək u mɔŋ paŋ na set saa la n paŋe.” Li paak, n sii faa parbiir n butuŋ na paak nan parpeenɛ, a Masia paŋ-ii be n ni. <sup>10</sup> Li-i tee Masia paak ki n di butinn, ki laat sukut, ki di biak nan mukisuk, ki laat barii, n mək parpeenn, kimaan mi-i taŋi kii mək n tiɔŋ paŋ yoo nba, li yooe ki n laat Masia paŋ.

*Pɔɔl baka nba be Korint teeb ni bianjinba*

<sup>11</sup> Li-i bonni tee ki yimme piakin, ɲanne bo sii ɲan; ɲaan yaa ki piakin na paake ki n piak n mɔŋ nan n tee jatuk na. Mi-i kii tee siar, ɲaan binba kpann a bi tee Masia toomiinba na ki garimi. <sup>12</sup> Maa din be i boor ni ki tuun bakiɲaun nyina nan toonjaana, ki di sukuru yoo kur na, ɲanne want nan n set tee Masia toonii. <sup>13</sup> Nlee ki Masiaweileeb na cheeini? Maa ki boi-i sommir po na, ɲanne te ki bi cheeini? Li-i tee ɲanniie te ki n mək biit, yin teenin gafara.

<sup>14</sup> Taar muntaa nae na ki n yaa n baar ki ɲoni. ɲaan n ki yaa n baar ki loon siar kaa i boori. N loon yimme, li ki tee n loon i likirii kaa. Waas kaa loon bont ki teen bi dammi. Wadamme loon bont ki teen bi waas. I tee n waase, <sup>15</sup> li paake ki li manin nan man jii n mɔŋ ki turi, ki tun nan ninmɔnn ki sommi. Ki mi-i looni bonchiann, yimm sii loonin waaminnae-e?

<sup>16</sup> Li tee barmɔniie, n din ki mukisi a yin turin bonsiar, ɲaan ki i siab yeen a n din kpannie ki fati. Nlee ki n din fatini? <sup>17</sup> Maa din tun niib nba

i boor na, bi sɔɔ din mi ki ŋmab i bonsiar ki tan turimi-i? <sup>18</sup> N din barin Taitus maa wun saan i boor, ki bia te ki ti naa bisɔɔ weiɔ. Taitus din mi ki ŋmab i bonti-i? Ti ki mɔk li dudukiti. Maa tuun bianjinba, u mun tuun nnae. Maa waa sɔnu nba, u mun waa ŋanne.

<sup>19</sup> I dukii taa piak na, ti loon ki ti nyinn ti mɔŋ barii nie-e? Li ki tee nna kaa. Ti be Yennu tɔɔnne, ki piak Masia nba loon bianjinba. Ti naa walonkai, ti loon ki ti sommie ki yin wei Yennu sɔnu fanu. Ŋanne te ki ti piaki linba na. <sup>20</sup> N yan put i paake nan maa tan saa baar i boor ki kan la ki i be nan maa loon yii be bianjinba na; ki i mun kan la ki n be nan yaa loon mii be bianjinba na: n mɔk jijeet nan n saa lai ki i kɔn nan leeb, ki mɔk funfunn nan leeb, ki dont wutoor leeb paak, ki lukitir leeb, ki sukii leeb, ki biir leeb, ki mɔk karinbaanii, ki tee kpirkpir; <sup>21</sup> n bia mɔk jijeet nan Yennu saa te ki n di fei i paak; ki n par saa biir i bonchiann paak, kimaan bi poŋ tun toonbiit, nan jakint toona, nan bonchonchonn toona, nan lammeeuk, ki ji ki tiin fei, ki bia ki nyik bi biit maŋ tumu.

## 13

### *Kpaanjoontii nan foontjoontii*

<sup>1</sup> N saa baar ki tan foonti ki pukin taar muntaa. Li-i tee ki i jii sɔɔ taari, n kan saki, see ki siaradamm banlee koo bantaa pak biir li yɔɔ. <sup>2</sup> Maa din baar i boor taar munlee ni na, n din kpaan yimm nba poŋ tun toonbiit na, nan i leeb kura. Maa ji ki be i boor ni na, ŋaan n lek kpaani nan maa din poŋ kpaani bianjinba sinsinn nae;

mi-i taŋi baar, n saa dat bi tubawa. <sup>3</sup> Nanne saa wann nan Masia-e te ki n piak. U ki tee butimoo kaa i sinsuuk ni, u mok paŋ i boor. <sup>4</sup> U din jii u paŋ maŋe ki bakin bir ŋaan sak ki bi kpaau dapunpunn paak. Motana, Yennu paŋ paak ki u be manfoor ni. Timm nba lakin be u ni na ki mok paŋi, ŋaan taa lakin taan nanoo na paak, ti mun mok manfoor, Yennu paŋ paake, ki fit wanti li paŋ.

<sup>5</sup> Gotir i moŋ binbenj ni ki laan i set teen Yiisa Masia yada amii i ki teeni; li kpaas talas ki yii gorii i moŋ binbenj nba tee bianjinba. I ki mi nan Yiisa Masia be i nie-e? U set be i ni, kimaan li-i tee ki u ki be i ni, ŋann i ki tee u niib nan barmonii. <sup>6</sup> N mok dindann nan i saa bann nan timm ŋarin tee u niibe nan barmonii. <sup>7</sup> Ti mei Yennu teeni a i daa tuun toonbiiti. Li ki tee ti yaa tin wann a ti mok monii kaa; li-i lekii tee ki i dukii a ti ki mok monii, ŋaan ti loon ki yii tuun toonŋanae, <sup>8</sup> kimaan ti ki loon ki tin jiin Yennu moamaan poori; ti loon ki moamaan maŋe n doŋ toonn. <sup>9</sup> Li-i tee ki i mok paŋ ki tuun toona nba ŋan, ŋanne saa maŋ ti para, kimaan ti ki loon ki tin wanni ti paŋ kaa; li paake ki ti mei Yennu ki teeni, a yin ŋamm i binbenj. <sup>10</sup> Li paak, maa ki be i boor nae ki n sobin gbouŋ na ki teeni, a mi-i taŋi baar i boor yoo nba, li kii kpaas talas ki n dat i tuba ki wann n paŋi. Ti Yomdaanoe din turin yudantuk na a n sommi ki yin wei u sonu fanu. U din ki turin yudantuk maŋ a n biiri kaa.

<sup>11</sup> N naa waas, linba ji biar tee min chabie. Nammit i sonu kii saak n kpaanii man, kii mok motaauk nan parmaasir; ki Yennu nba loonit ki

teent parmaasir na sii be nani.

<sup>12</sup> Ii foont i leeb kii kpamii man.

Yennu niib nba kur be nna na foonti.

<sup>13</sup> Ti Yomdaano Yiisa Masia ninkpabaun, nan Yennu lomm, nan Seyeeŋ mɔtaauk na-ii be nan i kura.

**Yennu Gbouj Moor**  
**Bimoba: Yennu Gbouj Moor Bible**

copyright © 2003 Wycliffe Bible Translators, Inc.

Language: Bimoba

Contributor: Wycliffe Bible Translators, Inc.

All rights reserved.

2020-11-16

---

PDF generated using Haiola and XeLaTeX on 21 Feb 2024 from source  
files dated 29 Jan 2022

00d89ba0-4677-52d9-9bc5-aa3d7c5c966d